

每週經課朗誦經文(巴克禮漢羅/教羅)2013/12/22

共同經課 - 1

以賽亞書七章十節～十六節

10 耶和華 koh 吩咐 A-hap-su 講，11 你 tiòh 對耶和華你 ê 上帝求一個兆頭；thang 求伊 tī 深淵 á 是極高 ê 天。12 A-hap-su 講，我 m̄ 求，亦 m̄ 試耶和華。13 以賽亞講，大衛 ê 家 ah，lín tiòh 聽；lín hō 人爲難，kiám 算做小 khoá 事，亦 beh hō 我 ê 上帝爲難 mah？14 因爲 án-ni，主本身 beh hō lín 一個兆頭；看 ah，有在室女 beh 懷孕生 kiáⁿ，kā 伊號名叫以馬內利。15 到伊會曉得放 sak pháiⁿ，揀好 ê 時，伊 chiah beh 食奶油 kap 蜜。16 因爲 tī chit-ê gín-ná iáu 未曉得放 sak pháiⁿ 揀好 ê 事先，你所驚 ê hit 兩個王 ê 地 beh tú-tiòh 放 sak。

共同經課 - 2

詩篇八十篇一節～七節，十七節～十九節

1 A-sat ê 詩；交 hō 樂官；調用「做干證 ê 百合花」。1) 以色列 ê 牧者 ah，chhoā 約瑟親像羊群 ê，求你 àⁿ 耳孔聽；坐 tī ki-lō 兵 ê 頂面 ê，求你發出你 ê 光。2 Tī Í-hoat-liân、便雅憫、Má-ná-se ê 面前，展出你 ê 權能，來救阮。3 上帝 ah，hō 阮 tò-tńg；Hō 你 ê 面發出光，阮就得 tiòh 救。4 萬軍 ê 上帝耶和華 ah，你 òng 你 ê 百姓 ê 祈禱發出受氣，beh joā 久 ah？5 你用目屎做食物，hō in 食；Koh 量 choē-choē 目屎 hō in lim。6 你 hō 隔壁國因爲阮來相爭，阮 ê 對敵相 kap teh 笑。7 萬軍 ê 上帝 ah，hō 阮 tò-tńg，Hō 你 ê 面發出光，阮就得 tiòh 救。17 願你 ê 手岸 tī 你 chiàⁿ-pêng ê 人，就是你爲家己所堅固 ê 人子。18 Án-ni，阮就無倒退離開你；求你 hō 阮得 tiòh 活，阮就 beh 求叫你 ê 名。19 萬軍 ê 上帝耶和華 ah，hō 阮 tò-tńg；Hō 你 ê 面發出光，阮就得 tiòh 救。

共同經課 - 3

羅馬書一章一節～七節

1 耶穌基督 ê 奴僕保羅，受召做使徒，分別伊來傳上帝 ê 福音，2 就是上帝從前託伊 chiah-ê 先知 tī 聖經所應允 ê，3 論伊 ê Kiáⁿ，照肉體是 tùi 大衛 ê 後裔生 ê，4 照聖德 ê 神就 tùi 死人 ê koh 活，用權能顯明伊是上帝 ê Kiáⁿ，5 就是咱 ê 主耶穌基督：阮對伊受恩 kap 使徒 ê 職，beh 爲 tiòh 伊 ê 名 hō 人 tī 萬邦中信來順 thàn；6 從中也有 lín chiah-ê 受召屬耶穌基督 ê；7 phoe 寄 hō 見若 toà tī 羅馬，上帝所疼，受召做聖徒 ê；願 lín 對咱 ê 父上帝 kap 主耶穌基督得 tiòh 恩典平安。

共同經課 - 4

馬太福音一章十八節～二十五節

18 耶穌基督 ê 出世，記 tī 下底：伊 ê 老母馬利亞已經做約瑟定 tiòh，iáu-bē 娶過門，就 tùi 聖神有身孕。19 伊 ê 丈夫約瑟是義 ê 人，m̄ ài 顯然辦伊，按算 beh 暗靜廢親。20 Teh 想 ê 時，有主 ê 天使 tī 伊 ê 眠夢中出現講，大衛 ê 後裔，約瑟 ah，莫得驚，tiòh 娶你 ê bó 馬利亞過門；因爲伊所懷孕 ê 是 tùi 聖神。21 伊 beh 生 kiáⁿ，你 tiòh 叫伊 ê 名做耶穌；因爲伊 beh 救伊 ê 百姓 脫出 in ê 罪惡。22 Chit-ê 事 lóng 成，是 beh 應驗主託先知所講 ê，講，23 你看，在室女 beh 身孕生 kiáⁿ；人 beh 叫伊 ê 名做以馬內利；翻譯就是上帝 kap 咱 tī-teh。24 約瑟睏醒起來，照主 ê 天使所命令去行，娶伊 ê bó 過門；25 無 kap 伊同房，到伊生 kiáⁿ；就叫伊 ê 名做耶穌。